

## DOMENIE II «VIE PAL AN»

### Antifone di jentrade Sal 65,4

**D**enant di te si plee dute la tiere  
e al to non e cjante, o Altissim.

### Colete

Diu onipotent e eterni,  
che tu rezis tant lis robis dal cîl che chês de tiere,  
scolte cun boncûr lis preieris dal to popul  
e regalinus la pâs ai nestrîs dîs.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE Is 62,1-5

*Il nuviç si consolarà cu la sô nuvice.*

Dal libri dal profete Isaie  
Par amôr di Sion no tasarai,  
e par amôr di Jerusalem no mi darai pâs,  
fin che la sô justizie no crichi tant che l'albe  
e la sô salvece no lusi tant che une torce.  
In chês volte i forescj a viodaran la tô justizie  
e ducj i rês la tô glorie,  
e tu sarâs clamade cuntun non gnûf,  
che la bocje dal Signôr lu disarà.  
Tu sarâs une zoe sflandorose te man dal Signôr,  
une corone reâl tal dret de man dal to Diu.  
No ti disaran plui “Bandonade”,  
parcè che ti disaran “Il gno gust al è in jê”,  
e la tô tiere “Maridade”,  
parcè che il Signôr al cjate gust in te,  
e la tô tiere e varà un nuviç.  
Propit, come un fantat al cjol une fantate,  
ti maridarà chel che ti à fate sù;  
e come che il nuviç si console cu la sô nuvice,  
cussì il to Diu al gjoldarà di te.  
Peraule di Diu.

### SALM RESPONSORIÂL dal Salm 95

**R.** Tu âs fatîs gnovîs dutîs lis robis, Signôr.

Cjantait al Signôr une cjante gnove,  
cjantait al Signôr di dute la tiere.  
Cjantait al Signôr, il so non onoraitlu. **R.**

Contait di une dî daûr chês altre la sô salvece.  
A ducj i forescj contait de sô glorie,  
framieç di ducj i popui i siei spettacui. **R.**

Dait al Signôr, fameis dai popui,  
dait al Signôr glorie e potence,  
dait al Signôr la glorie che al so non i spiete. **R.**

Che e trimi denant di lui dute la tiere.  
Disêt framieç dai popui: «Il Signôr al regne!».  
Al ten sù il mont par no che al clopi,  
al judiche i popui cun justizie. **R.**

### **SECONDE LETURE 1 Cor 12,4-11**

**Il stes identic Spirt al divît a ognidun come che al vûl lui.**

De prime letare di san Pauli apuestul ai Corints

Fradis, e je une diviersitât di dons, ma un Spirt sôl; e je une diviersitât di servizis, ma un Signôr sôl; e je une diviersitât di ativitâts, ma un Diu sôl, che al fâs dut in ducj. E ognidun al à vude la manifestazion dal Spirt pal ben di ducj: un al à vude, dal Spirt, peraule di sapience; un altri invezit, midiant di chel stes Spirt, peraule di sience; un al à vude, simpri di chel Spirt, la fede; un altri il don di vuarî ta chel medesim Spirt; un la virtût dai miracui; un altri il don de profezie; un altri ancjemò il diserniment dai spirts; un altri la diviersitât des lenghis; un altri ancjemò la interpretazion des lenghis. Ma dutis chestis robis al è simpri chel stes identic Spirt che lis fâs, dividintlis a ognidun come che al vûl lui.

Peraule di Diu.

### **CJANT AL VANZELI cf. Zn 2,9.11**

**R.** Aleluia, aleluia.

Te gnoce di Cane

Jesù al tramudà l'aghe in vin;

lui al pandè la sô glorie

e i dissepui a croderin in lui.

**R.** Aleluia.

### **VANZELI Zn 2,1-11**

**Chest inizi dai spiei Jesù lu fasè in Cane di Galilee.**

Dal vanzeli seont Zuan

In chêt volte, a faserin une gnoce a Cane di Galilee, e e jere ancje la mari di Jesù. A invidarin a gnocis ancje Jesù, cui siei dissepui. Vignût a mancjà il vin, la mari di Jesù i dîs: «A son restâts cence vin». I dîs Jesù: «Ce vuelistu di me, femine? La mê ore no je ancjemò rivade». Sô mari ur dîs ai servidôrs: «Fasêt dut ce che us disarà». A jerin li sîs pilis di pierre pes abluzions dai Judeus, che a tignivin fin a un etoltri l'une. Ur dîs Jesù: «Jemplait lis pilis di aghe». E lis jemplarin avuâl dal ôr. Po ur dîs: «Cumò traêt e puartait al mestri di taule». Lôr int puartarin. A pene che il mestri di taule al cerçà l'aghe diventade vin (lui nol saveve dontri che e vignive, ma ben lu savevin i servidôrs che a vevin trate l'aghe), al clame il nuviç e i dîs: «Ducj a tirin fûr prime il vin bon e po, cuant che si è legris, chel plui scart. Tu invezit tu âs tignût cont il vin bon fin cumò». Chest inizi dai spiei Jesù lu fasè in Cane di Galilee e al pandè la sô glorie e i siei dissepui a croderin in lui.

Peraule dal Signôr.

### **Su lis ufiertis**

Danus la gracie, Signôr,

di celebrâ chescj misteris dispès e cun fede,

parcè che ogni volte che si fâs memorie di chest sacrifici

si colme la vore de nestre redenzie.

Par Crist nestri Signôr.

### **Antifone a la comunion Sal 22,5**

Tu prontis denant di me une taulade

e il gno bocâl al è plen che al stranfe.

O ben: 1 Zn 4,16

Nô o vin ricognossût e crodût al amôr che Diu al à par nô.

**Daspò de comunion**

Met in nô, Signôr, il spirt dal to bonvolê,  
par che, sostentâts cul unic pan dal cîl,  
o sedin unîts intun unic amôr.  
Par Crist nestri Signôr.